

**Uunga siunnersuut:**

**Inatsisartut Ombudsmandiat pillugu Inatsisartut inatsisaat**

**pillugu**

**Inatsisit Atortinneqarnerannut Ataatsimiititaliap**

**ILASSUTITUT ISUMALIUTISSIISUTAA**

**Siunnersuutip pingajussaaneerreqarneranut saqqummiunneqartoq**

Inatsisit Atortinneqarnerannut Ataatsimiititaliaq suliarinninnermini makkuninnga inuttaqarpoq:

Inatsisartunut ilaasortaq Harald Bianco, Inuit Ataqtigiit, siulittaasoq  
Inatsisartunut ilaasortaq Isak Hammond, Inuit Ataqtigiit, siulittaasup tullia  
Inatsisartunut ilaasortaq Justus Hansen, Demokraatit  
Inatsisartunut ilaasortaq Aleqa Hammond, Siumut  
Inatsisartunut ilaasortaq Akitsinnguaq Olsen, Siumut  
Inatsisartunut ilaasortaq Kim Kielsen, Siumut, ataatsimiititaliami sinniisussaq

**Ilassutitut isumaliutissiisuteqarnermut tunuliaqut**

Biskoppeqarfiup allaffia aamma Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoqarfik tamarmik immikkut novembarip ulluisa 15-ianni 17-iannillu Inatsisartut allaffeqarfiannut saaffiginnissuteqarput, Inatsisartut Ombudsmandiat pillugu Inatsisartut inatsisissaattut siunnersuummi § 9-mut nassuiaatit eqqoqqissaannginnerat malugeqqullugu.

Ajornartorsiut tikkuarneqartoq taamaallaat aalajangersakkamut nassuiaammut attuumassuteqarpoq. Inatsimmi aalajangersagaq (§ 9) eqqortuuvoq.

Ajoraluartumik inatsisissatut siunnersuutip Inatsisartunit siullermeerneqareernerata kingorna - tusarniaanermut akissuteqarnissamut piffissaritinneqartoq sapaatit akunneri arfinillit sinnerlugit qaangiutereersut – paasissutissat aatsaat Inatsisartut Allattoqarfiannit tiguneqarput.

Inatsisissatut siunnersuutip siullermeerneqarnera sioqqullugu naqqiutininik taagorneqartunik agguvaassineq aqqutigalugu inatsimmut nassuiaatit allanngortinneqarnissaannut periarfissaqarpoq. Periarfissarli taanna siullermeerinissap aallartinnissaata tungaanut taamaallaat atorineqarsinnaavoq. Taamaalilluni inatsimmut nassuiaatit ilusaannik naqqiinissamut maannangaq periarfissaqanngilaq. Aamma inatsimmut nassuiaatit allanngortinneqarnissaannik siunnersuutininik saqqummiussinissamut periarfissaqanngilaq.

Taamaattumik ilaatigut tamanna pissutigalugu pingaarutilerujussuuvoq tusarniaavigineqartut piffissaq eqqorlugu akissuteqartarnissaat, taamatullu aamma Naalakkersuisut naalakkersuisoqarfiisa tamanna pisariaqarsorinaraangat tamatumunnga atatillugu suliffeqarfinit atilerisanit oqaaseqaatinik pissarsiniartarnissaat.

Taamali oqareerluni Inatsisit Atortinneqarnerannut Ataatsimiititaliap ilanngullugu ajornartorsiutip tikkuarneqarsimanera qujassutigaa.

Inatsimmut nassuiaatit marlunnik siunertaqarput: Siullermik inatsisissatut siunnersuutit Inatsisartut aalajangiinissamut tunngavissarisasa ilagaat. Inatsisissatut siunnersuutip suna siunertarineraa inatsimmut nassuiaatini nassuiarneqartarpoq aammalu inatsisissatut siunnersuutip pingaaruteqarnera kingunerisassaalu nassuiarneqartarlutik. Aappasaanik inatsimmut nassuiaatit oqartussaasunut, eqqartuussivinnut allanullu inatsimmik atuisuusunut nassuiaatit atorineqartarput.

Ataatsimiititaliap matumani ilassutitut isumaliutissiissuteqarnermigut kissaatigaa inatsisissatut siunnersuummi § 9-p qanoq paasineqarnissaanut tapiliussamik (iluarsiissutaasumillu) ilanngussaqaarnissani, tamatumunngalu peqatigitillugu qularnaarlugu inatsisissatut siunnersuutip pingajussaaneerneqannginnerani Inatsisartut eqqortumik tamakkiisuunerpaamillu aalajangiinissamut tunngavissaqaarnissaat.

## **Inatsisissatut siunnersuummi § 9 pillugu**

Inatsisissatut siunnersuummi § 9-mi aalajangersagaq nutaajuvoq, Ombudsmandillu piginnaatitaaffiininik killiliinermik imaqarluni, pissutsinik ilagiit ajoqersuutaannut imaluunniit upperisamik nalunaajaanannut toqqaannartumik toqqaannangitsumilluunniit tunngasunik Ombudsmandip suliarinnissinnaaneraniq mattussisumik. Pissutsit ilagiit ajoqersuutaannut imaluunniit upperisamik nalunaajaanannut tunngasut taamaattoq aamma siusinnerusukkut Inatsisartut Ombudsmandiata misissuisarsimaneranut ilaatinneqarsimangillat.

Aalajangersagaq Folketingip Ombudsmandia pillugu inatsimmi § 9-p assigaa.

Aalajangersagaq Inatsisartut Ombudsmandiata piginnaatitaaffiinik killiliinermik allamik aamma imaqarpoq: Ilagiit taamaallaat Inatsisartut Ombudsmandiata piginnaatitaaffiisa iluaniitinneqarsinnaapput ilageeqarnermi pissutsit pillugit aalajangersakkanik Namminersorlutik Oqartussat aalajangersaasinnaatitaatillugit. Tamannali aamma inatsisissatut siunnersuummi § 7-p malitsigereerpaa, tassani aalajangersarneqarmat Namminersorlutik Oqartussani kommuninilu pisortat ingerlatsinerisa ilaat tamarmik Ombudsmandip sulineranut ilaatinneqartut.

Kalaallit Nunaata Namminersorneranut atatillugu pissutsit assigiinngitsut pillugit inatsisikkut nr. 474-ikkut, ulloq 12. juni 2009-meersukkut Folketingip inatsit piginnaatitsissutaasoq (Kalaallit Nunaanni ilagiit pillugit inatsit nr. 264, ulloq 6. maj 1993-imeersoq), 1993-illu kingorna ilageeqarnermut tunngasuni Namminersornerullutik Oqartussat malittarisassiorsinnaanermut allaffissornikkullu oqartussaanerannut tunngaviusimasoq, atorunnaarsippaa. Tamanna Kalaallit Nunaanni Namminersorneq pillugu inatsimmi § 23, imm. 4-p malitsigaa, tassani aalajangersarneqarmat suliassa qarfiit namminersorneruneq pillugu inatsimmi siusinnerusukkut atuuttumi § 5 naapertorlugu tiguneqarsimasut eqqarsaatigalugit Namminersorlutik Oqartussat tassaasut oqartussat inatsisiliorsinnaatitaallutillu atuutsitsisussaataasut.

Kalaallit Nunaata Namminersorneranut atatillugu pissutsit assigiinngitsut pillugit inatsisip atuutilernerani Kalaallit Nunaata biskoppeqarfiani biskoppit atorfilik, inatsimmi § 8 naapertorlugu Kalaallit Nunaanni oqartussani susassaqtuni atorfinitinneqarnissamik neqeroorfigineqartussaavoq. Kalaallit Nunaanni oqartussani susassaqtuni atorfinitinneqarnissani biskoppip kissaatiginnippagu, pineqartup naalagaaffimmit atorfeqartitaanera ingerlaannassaaq, suliaminilli ingerlatsinera Kalaallit Nunaanni oqartussani susassaqtuni pissalluni.

Taamaattumik biskoppip naalagaaffimmit atorfeqartitaanera ingerlaannassappat, tamanna Inatsisartut Ombudsmandiata piginnaatitaaffiisa avataaniissaaq, akerlianillu Folketingip Ombudsmandiata piginnaatitaaffiisa iluaniissalluni.

Suliassani ilageeqarnermi oqartussat biskoppip peqqussuteqarneratigut taannaluuniit suleqatigalugu ingerlatsivigisaanni, naatsorsuutigineqarpoq tamatumani misissuisoqassatillugu biskoppilu suli naalagaaffimmit atorfeqartinneqartillugu Inatsisartut Ombudsmandiata pisariaqartitsineq naapertorlugu Folketingip Ombudsmandia pisariaqartitsineq naapertorlugu peqataatittassagaa.

Taamatut oqaaseqarluni Inatsisit Atortinneqarnerannut Ataatsimiititaliap siunnersuut pingajussaaniigassanngortippaa, ataatsimiititaliap isumaqatigiittup inatsisissatut siunnersuutip akuerineqarnissaata inassutigineqarnera aalajangiusimallugu.

Harald Bianco  
Siulittaasoq

*Inuit Ataqtigiit*

Isak Hammond

*Inuit Ataqatigiit*

Justus Hansen

*Demokraatit*

Aleqa Hammond

*Siumut*

Akitsinnguaq Olsen

*Siumut*